

Minister Otmar Oduber:

‘Hopi decepciona den proceso pa trata sludge na dump di Parkietenbos’



ORANJESTAD - E siman aki a habri cu bishita di DOW, Serlimar y diferente experto y profesionalnan pa analisa e situacion andando di e proceso di maneho di sludge. E sludge cu ta procedente di e rioolwaterzuivering-sinstallaties (RWZI) ta un substancia cu ta consisti di en averahe 80% di awa cu nivel halto di diferente tipo di bacteria, virus y parasitos.

Segun un comunicado di oficina di minister di Infra-structura, gobierno di Aruba ta paga 1.3 miyon florin pa aña na e compania pa kima



y seca e sludge, y pa despues e wordo tira riba e landfill. A constata cu e sistema aki, cu ya ta pagando p’e pa 7 aña, no ta funciona manera debe ser! Esaki ta exactamente locual cu ya a wordo detecta a traves di un rapport na 2016.

Riba e imagennan aki por mira e situacion desagradabel cu a constata durante bishita na Parkietenbos pa presencia con ta atende cu e ‘sludge’.

Por mira cu ta kimando e sludge den aire liber, den un mashin cu e compania tin especificamente pa esaki. Sinembargo, por tuma nota cu ora cu e sludge sali for di e mashin, e no ta sali den forma di ‘as’ e ta sali practicamente mescos cu con e ta dreña. Locual cu sali for di e mashin ta wordo combina cu entre otro santo, piedra y palo, pa despues deposita esaki riba e sero di dump. Esaki ta causa masha molester di musca y cu riesgo di propagacion di malesa, door cu e contenido di bacteria y virus no ta wordo destrui debidamente.

Gobierno kier cambia e proceso aki pa uno hopi mas amical pa nos medio ambiente a traves di un incinerator cual ta un mashin completamente cera. Adkiriendo e incinerator aki ta atende cu mas cu un reto cu nos isla tin, cual ta pa maneho di desperdicio medicinal y bestianan morto y ta bay mas den direccion di maneho di desperdicio responsable.

